

## Uunga

allannguutissatut siunnersuut

**Siunnersuut uunga: Suliniutini angisuuni illuliortiternernik sanaartornernillu suliasat pillugit Inatsisartut inatsisaata nr. xx, xx. xxx xxx-imeersup allanngortinnissaa pillugu Inatsisartut inatsisaat**

Inuussutissarsiornermut Ataatsimiititaliamit aappassaaneerinninnissamut saqqummiunneqartoq.

## § 1-imut

1. Nr. 3-mi § 10 c-mi imm. 2-4-tut ilanngunneqassapput:

“Imm. 2. Sulisup nunamit allameersup sulisitsisuata isumagissavaa sulisuusup nerisaqarneranut, ineqarneranut, sullisinut, akiliunneqarluni angalasarneranut sillimmaserneqarneranullu aningaasartuutit matussusernissaat.

Imm. 3. Ataatsimoorussamik isumaqatigiissutini imaluunniit atorfininnermut isumaqatigiisummi aalajangerneqartut tunngavigalugit akissarsiat naatsorsorneqarneranni sulisumut nunamit allameersumut nerisaqarnerup, ineqarnerup, sullisit, akiliunneqarluni angalasarnerit aamma sillimmasiinerit nalingi ilaasutut naatsorsorneqarsinnaapput, pineqartut ataatsimut nalingat sapaatip akunneranut aalajangersimasumik angissusileriikkamit qaffasinerunngippat, takuuk imm. 4.

Imm. 4. Naatsorsuinermi imm. 3-mi pineqartumi aningaasat nalingat ilanngaatigineqarsinnaasoq Naalakkersuisunit aalajangersarneqartassaaq tamanna pillugu nalunaarummik suliaqarnikkut, aammalu Naalakkersuisut naliliinerat tunngavigalugu nerisaqarnermut aamma ineqarnermut, sullisinut, akiliunneqarluni angalanernut aamma sillimmasiinerit aningaasartuutitut tunngatillugu. Januaarip aallaqqaataa aallarnerfigalugu ukiup Naalakkersuisut nalunaarummik suliaqarnerata qaangiunnerani nalunaarummi aningaasat amerlassusii aalajangersarneqarsimasut atuisunut akit qaffakkiartornerat tunngavigalugu iluarsiivigineqartassapput”.

**Allannguutissatut siunnersuummut nassuiaatit**

Allannguutissatut siunnersuutip kingunerissavaa § 10 c, imm. 2-mi ersarissumik aalajangersarneqassamat sulisitsisoq sulisartup nunamit allameersup nerisaqarneranut, ineqarneranut, sulliseqarneranut, angalaneritut akiliunneqarnissaanut sillimmaserneqarneranullu aningaasartuutit matussusiisussaasoq.

Siunnersuummi § 10 c, imm. 3 naapertorlugu sulisup nunamit allameersup tunngaviummik akissarsiaasa naatsorsorneqarneranni sulisitsisuusup nerisaqarnermut aamma ineqarnermut, sulliseqarnermut, akiliunneqarluni angalasarnermut, sillimmaserneqarnermut il.il. aningaasartuutit ilanngullugit naatsorsuutigisinnaavai. Taamaaliornikkut qulakkeer-

neqassaaq kalaallip sulinermik inuutissarsiuteqartup aamma sulinermik inuutissarsiuteqartup nunamit allameersup Kalaallit Nunaanni suliffeqartup akissarsiaasa pisissutaasinnaanermikkut naligiimmik inissisimanissaat. Sulinermik inuutissarsiuteqartoq kalaaleq nerisaqarnermut ineqarnermullu aammalu sillimmasiissutitut aningaasartuuteqarpoq aammalu sullisinut sulinnigiffeqarlunilu angalanernut aningaasartuuteqarsinnaalluni. Aningaasartuutit taakku nalingat ilanngaatigereerlugu akissarsiat sinneruttut kalaallimut sulinermik inuutissarsiuteqartumut akissarsiat minnerpaaffissaannit minnerusumik isumaqatigiissutaasumilluunniit allanit annikinnerusumik tigusaqartarpoq. Taamaattorli sulisartup kalaallip aammalu sulisartup nunamit allameersup pisisinnaassusiisa *assigiilluinnarnissaat* siunnersuutikkut qulakkeerneqanngilaq; Sulisartut kalaallit isumaqatigiissut naapertorlugu tunngaviusumik akissarsianut ilanngullugit naatsorsorneqanngitsunik assersuutigalugu sulliseqarsinnaatitaasinnaapput imaluunniit akiliunneqarlutik angalasinnaatitaasinnaallutik. Tamatuma saniatigut sulisartut kalaallit nakorsamit ikiorneqarnissamut il.il. aningaasartuutit matussuserneqarnissaannut sillimmasiissuteqarnissamut aallaaviatigut pisariaqartitsinngillat, tassami peqqinnissaqarfiup sullississutaanik akeqanngitsumik atuisinnaatitaagamik.

Siunnersuummi § 10 c, imm. 3 aamma 4-mi aalajangersarneqarpoq sulisitsisup sulinermik inuutissarsiuteqartup nunamit allameersup tunngaviusumik akissarsiaanut ilaasutut naatsorsuutigisinnaasaata annerpaaffissaa Naalackersuisut tamanna pillugu nalunaarusiornikkut aalajangersartassagaat. Angissutsip annertunerpaaffissaa nerisaqarnermut aamma ineqarnermut, atisanut sullisinut aningaasartuutitut, akiliunneqarluni angalanernut aammalu sillimmasiinnermut aningaasartuutit pineqartunik naliliinnermik tunngavilimmik Naalackersuisunit aalajangerneqartassaaq. Taamaaliornikkut qulakkeerneqassaaq pineqartut nalingisa sulisitsisumit qaffasippallaamik aalajangerneqannginnissaat. Tamanna periarfissaasimagaluarpat sulisitsisup sulinermik inuutissarsiuteqartup nunamit allameersup tunngaviusumik akissarsiassaa nalikinnerulersissinnaassagaluarma. Siunnersuutikkut taamaasilluni sulinermik inuutissarsiuteqartup nunamit allameersup illersorneqarnera aalajangiusimaneqarpoq.